

DESOBEDIENTZIALARIAK. Ekintza ez-bortitza

GARI GARAIALDE / ARGAZKI PRESS

Adreiluzko harresia jarri dute Portugaleteko NAN bulegoan

Espainiako Administrazioak Portugaleten (Bizkaia) nortasun agiriak tramitatzeke duen bulegoaren aurkako ekintza ikusgarria egin zuten Burujabetzaren Aldeko Desobedientzialariak taldeko kideek atzo eguerdian. Taldeko hamalau kidek NA txartelak kudeatzeko bulegoa modu sinbolikoan itxi nahi izan zuten, eta horretarako adreilu sorta batez osaturiko horma bat altxatu zuten atarian. Burujabetzaren Aldeko Desobedientzialariek Bizkaian egin duten lehenbiziko ekintza ez-bortitza izan zen atzo Ezkerraldeko herrian egindakoa.

PROTESTA. Batasunaren aldeko leloak zituzten

LANDER F. ARROIABE / ARGAZKI PRESS

Nafarroako Parlamentuan kateatuta ilegalizazioa salatzeke

Batasuna legez kanporatzeko asmoa salatzeke, lau lagun Nafarroako Parlamentu egoitzako sarrerako teilatutxoan kateatu ziren atzo goizean. Iruñeko Arrieta kalean dagoen egoitzan, gazteek *Ilegalizaziorik ez. Aurrera Batasuna. Euskal Herria aurrera* zioen pankarta zabaltu zuten, eta ilegalizazioaren aurkako oihuak bota zituzten. Berehala Foruzaingoa azaldu zen. Foruzainek gazteen kateak hautsi zituzten, eta eskuburdirak jarri atxilotuta eraman zituzten Foruzainen komisariara. Deklaraziorik hartu gabe aske utzi zituzten.

SEGI. Gipuzkoatik zetozen hiru autobus Biriaturun blokeatu dituzte

Ehunka lagunek salatu dute Baionan gazteen aurkako zapalkuntza eta jazarpena

«Ez gara inoiz makurtuko haien legera», adierazi du Segik



GAIZKA IROZ

Manifestazioaren buruko ikurrin eramaileen atzean joan zen pankarta nagusia, atzo, Baionako karriketan.

Eneko Bidegain | BAIONA

OMENALDIA

Eneko Aizpuru preso ohiari aureskua dantzatu diote, estradizio «auzi faltsua» zain daukala

Ehunka lagun bildu ziren atzo arratsaldean Baionan, gazteak eta ez hain gazteak, Segik antolatutako manifestazioan. *Utzi pakean euskal gazteria, Independentzia sozialismoa, Amnistiarik gabe bakerik ez* eta bertze oihu ugari entzun ziren Baionako karriketan. Euskal gazteriaren kontrako «estrategia errepresiboaren» salatzeke jende ugari bildu zen Lauga gelaren aurrean. Manifestazioa ez zen abiatu 17:00etan tanko, ohiko beranta errespetatuz. Jendea itzalpean egon zen jarri, giro lasaian. Frantziako Poliziak Gipuzkoatik zetozen hiru autobus Biriaturun gelditurik atxiki zituen, baina ez zuen eragotzi lagun andana bat elkartzea.

Ibilaldi guztia lasaitasun giroan iragan zen, batzuetan oihu eta txistuen artean. Komisariaren eta suprefeturaren aurretik pasatzean, manifestari batzuk txistuka hasi ziren. Poliziek komisariarako eta suprefeturako bidea indarrez moztua zuten, ohi duten bezala. Manifestazioak bere bideari jarraitu zion, poliziekin istilurik gertatu gabe.

Ibilaldian zehar atxikimendua agertu zuten hainbat elkar-

te eta erakundetako jendeak eta pankartak baziren. Alderdi politikoen aldetik, Batasuna eta ABko ordezkartza bat bildu zen manifestaziora. Ipar Euskal Herriko hainbat gaztetxe eta gazte erakundetako kideek pankartak ekarri zituzten. Gazteen gurasoak biltzen dituen Bihar elkarteak ere bai.

Hitza hartzeko denboran, Bihar elkarteko kide diren Terexa Etxeberria eta Nathalie Valles-ek kezka agerrarazi zuten. «Biziki kezkatuak gara, gure haurrek jasaten duten zapalkuntza indiskriminatua ikusirik». Atxiloketa eta auzibideen helburua «gazteen iniziatibak haustea» dela salatu zuten. «Gazteria herri baten geroa da, biharko jendartearen oinarria».

Kritikak Europari ere egin zizkioten, mugimenduak legez kanpo uztea «onartzen» duela. «Ez dugu nahi Euskal Herria

erabateko segurtasunaren esperimentazio zelai bihurtu dadin», adierazi zuten.

Borroka eta antolaketarako deia

Emilie Laplacet Segiko kideak bururatu zuen ekitaldi politikoa. «Inoiz baino atxikimendu gehiago» lortzeagatik pozik agertu zen. Azkenaldiko «erasoa» ez dela soilik «Segiren aurkakoa, baizik eta euskal herritar guztien aurkakoa» argudiatu zuen. Horren aurka «borrokatzu eta antolatuz» erantzuteko deia egin zuen. «Edozein mota-tako ekimenak antolatzeagatik zigortzen gaituzte. Euskal gazteria kriminalizatu nahi dute. Baina zer uste dute? Errepresio bidean segituz lortuko dutela gure hatsa gelditzea?». Laplacet baikor agertu zen geroari begira. «Chirac eta Aznarrek ez dute lortuko, ez gara inoiz makurtuko haien legera, indarrak batzen badakigulako».

Eneko Aizpuru aste honetan aske atera den Segiko kideari omenalditxo eskaini zioten, aureskua dantzatzu, txalo zaparradaren erdian. Uztailean izanen duen estradizio «auzi faltsua» aitzinetik salatu zuen Laplacetek. Aizpuru gazteria ez dela borrokatik geldituko azpimarratu zuen.